



21. marsi 2022

UPA2022/23/24

**Suliffissarsiornermut ikiorsiissutit pillugit Inatsisartut inatsisissaat
aamma uunga siunnersuut: Pisortanit ikiorsiissutit pillugit Inatsisartut inatsisissaattut
siunnersuut**

(Isumaginninnermut, Suliffeqarnermut Nunamullu Namminermut Naalakkersuisoq)

Suliffissarsiornermut ikiorsiissutit, pisortaniillu ikiorsiissutit pillugit Siumumit imaattumik oqaaseqassaagut. Erseqqissassavara oqaluuserisassani immikkoortut 23 aamma 24 ataatsikkut uani oqaaseqarfigissagakkit.

Pilersikkumavagut inuiaqatigiit nunamik tunniussinnaasai akisussaassuseqartumik atorluarlugit avataaniillu pisariaqartitatik iluaqutigalugit imminnut napatittut. Unalu inatsisit atuuttut allangortinneqarnissaanik siunnersuut, Siumumi pilersikkumasatsinnut qaninnerulersitsisinnaasussatut isigaarput.

Nunatsinni sullinneqartunut tamanut sullissineq pitsaanerpaaq naligiinnerusorlu una inatsisissatut siunnersuut – siunertarisamigut atuutsinneqaruni - aqutigalugu anguneqarsinnaavoq, tamannalu ineriartortinneqassaaq Namminersorlutik Oqartussat kommunillu qanimut suleqatigiinnerisigut. Inuk pineqartoq qitiutillugu, inuiaqatigiinnilu tamakkiisumik suleqataaqqilernissaa siunertaralugu. Tamatumani pisortat piumasqaataat salliutinneqassanngillat - inuup pisinnaasai periarfissaalu salliutinneqassasut Siumumit tunngavigaarput.

Eqqaamasassavullu sunaanersut tamatta ilisimaarigivut naatsorsuutigaarput. Nunami isorartuummi, sumiiffinnilu assigiinngisitaartumik periarfissaqarfiusumi inuuvugut. Isumaginnikkut sullissineq immiut ikiornissamik napatinnissamillu aallaaveqartumik ingerlanneqassasoq pisariaqarpoq. Inuiaqatigiit ineriartoqqinnissaannut siuariartornissaannullu atugarissaarneq tunngaviusaaq. Tamannalu aatsaat tamakkiisumik pilersinnaavoq, pisinnaasut tamatta suligutta inuiaqatigiinnullu nalilimmik tunniussaqluta.

Inuiaqatigiit atugarissaarnikkut nukittuumik inissimasut ilaqtariit tunngavissaraat, ikiorneqarnissamillu pisariaqartitsisut ikiorneqarnissaat qulakkeerneqassaaq. Ikiorseeriaaseq qanoq iluseqartoq sulinermik ingerlataqartut kattuffiisa isummersorsimaneranittaaq aallaaveqassasoq Siumumit kissaatigaarput.

Inuiaqatigiit atugarissaarnerat pitsaasoq tassaavoq peqqinnissamut, ilinniarnissamut suliffeqarnissamullu atugarisatigut periarfissaqarneq, - sumi najugaqarneq inissisimanerluunniit apeqqutaatinngit. Inuk qitiutillugu inuiaqatigiitsinni kiffartuussineq pissaaq. Taamaattumik Siumumit isumaqarpugut nunatsinni innuttaasoq kinaluunniit peqqissoq immiut napatinnissaminut anersaaqartoq sulinerup tungaartigut killilersorneqassanngitsoq, tamattalu taanna pinngitsoqarata soqutigisaralugulu anguniagarissagipput.



Pingaaruteqarpoq suliffissanik nutaanik eqqarsartuarnissarput. Suliffinnik nutaanik nutaamillu eqqarsartuarneq politikikkut siunnerfigigaanni, uuma inatsisip nunatta inuinit tamanut naleqquttuunissaa qulakkeerneqarsimassasoq pisariaqarpoq.

Inuussutissarsiorneq suliffissanillu nutaanik pilersitsisarneq suliffissaaleqinerup appartinnissaanut tamattalu aningaasarsiornermut peqataalernissatsinnut matuersaatituaavoq. Taamaakkami ikiorsiissutit pineqartillugit illuatungaa pingarneq, tassalu aningaasarsiorfissanik pilersitsinissamik suliniuteqartuarnissaa, qitiutillugu isiginiarneqassasoq Siumumit isumaqarpugut – naatsorsuutigaarpullu inatsimmik uuminnga atuutsitsillutik suliaqartussat taamatut anersaaqarlutik inoqatitsinnik ikiuinertik ingerlakkumaaraat.

Nunatsinni inuk kinaluunniit atugarisami pitsanngorsartuarnissaanut siullertut nammineq akisussaaffeqarpoq, inuiaqatigiinnilu tamatta pisussaaffigaarput tamatuma tikitsernissaanut aqutissiuineq peqataaffigissallutigut. Inuk kinaluunniit timikkut tarnikkullu peqqissoq sulissaaq. Namminerlu piumassuserinngisaminik suliunnaarsinneqarsimagaanni uani inatsimmi pineqartumi sulileriaannartut nalunaarsorneqarsimalluni sulileqqinnissamut aqutissiuunneqassaaq, pisariaqarfiatigut ikorfartorneqarluni.

Siumumit isumaqarpugut, qaqugukkulluunniit sulineq tamatsinnut orniginarneraluni inissisimajuassasoq, aamma sulineq naleqarneraluni inissisimajuassasoq. Tamannalu aamma piumasaqaatitaqarpoq. Piumasaqaataavoq suliffissat amerlanerit inuit ingerlataat, avammullu niuertut pilersissallugit siunertaqarnerussasugut. Taamaattumik inatsisissap uuma atuutsinneqalernerani piumasaqaataavoq, inuussutissarsiornikkut ineriartortitsineq ullumikkornit naammassisaqarfiunerusumik ingerlatissagatsigu pisariaqartissallutigulu – Nunatta tunniussinnaasai akisussaassuseqartumik atorluarlugit pisariaqartitatsinnik ingerlatsinerulernissaaq pisariaqartoq aallunnerulerlugu.

Allatut oqaatigalugu: Nunatsinnik atuinerput aningaasarsiornitsinnut tunngasoq erseqqinnerujussuarmik politikeqarfigilernissaa pisariaqarpoq. Tamannalu suleqataaffigissallugu Siumumit pisarnitsitut piareersimavugut.

Ataatsimiititaliami susasaqartumi suleqqinnissatsinnut apeqqutit arlallit eqqarsaatitsinniitsissagivut naatsorsuutigaarput. (1) Ikiorsiissutit sulinerup akilersinnaanerujuarnissaanik qulakkeerinittumik annertussuseqassasut, (2) inuit sulisinnaasut tamarmik sulilernissaminnut periarfissaqassasut, (3) aaqqiissutissat nunap immikkoortuini piumasaqaasersuinnikkut allanngorartarsinnaasut, (4) inuit periarfissaat piginnaasaallu aallaavigalugit aaqqissuussinerput tunngavilerneqarsimassasoq, (5) nem-id sumiiffiit ilaasa attaveqaatitigut periarfissalunnerat pissutaalluni atorineqarsinnaasanngitsup aaqqinnissaa minnerunngitsumillu (6) sumiiffinni majoriaqarfiunngitsuni aaqqissuussineq qanoq iluseqassanersoq nalilersussallugu pingaaruteqartoq.

Taamak oqaaseqarluta ataatsimiititaliamut ingerlateqqinneqarnissaa innersuussutigaarput, suleqataanissatsinnullu Siumumit qilanaarpugut.

Lars Poulsen, Siumut